

SOALAN NO: 84

PARLIMEN MALAYSIA
PEMBERITAHU PERTANYAAN DEWAN RAKYAT

- PERTANYAAN : Lisan**
- DARIPADA : Datuk Seri Panglima Haji Abdul Ghapur [Kalabakan]**
- TARIKH : 31 Julai 2017 (Isnin)**
- SOALAN : Datuk Seri Panglima Haji Abdul Ghapur bin Salleh minta MENTERI PERTANIAN DAN INDUSTRI ASAS TANI menyatakan:-**
- (a) mengapa di daerah Tawau tidak cukup pembekalan beras pulut dan adakah Kementerian sedar kemungkinan besar beras pulut ini diseludup ke negara jiran Indonesia atau beras pulut ini disorok oleh para peniaga dan seterusnya menaikkan harga di musim-musim perayaan Hari Raya; dan
- (b) adakah Kementerian maklum atas perkara ini dan jika ya, apa tindakan yang sudah diambil terhadap peniaga-peniaga ini.

JAWAPAN**Tuan Yang Dipertua,**

- (a) Isu ketidakcukupan beras pulut di Daerah Tawau baru-baru ini adalah disebabkan oleh masalah kelewatan penghantaran bekalan stok ke Pelabuhan Tawau dan Sandakan. Bagi mengelakkan masalah ini berulang BERNAS telah diarah untuk membuat perancangan dengan lebih teliti dalam menentukan kuantiti permintaan beras pulut di negeri Sabah khususnya daerah Tawau.
- (b) Sehingga kini tiada rekod dan tangkapan mengenai aktiviti penyeludupan ke Indonesia dan penyorokan (*hoarding*) beras pulut berlaku.

**PEMBERITAHUAN PERTANYAAN
DEWAN RAKYAT**

PERTANYAAN : BAGI JAWAB LISAN

**DARIPADA : PUAN HAJAH SITI ZAILAH BINTI MOHD
YUSOFF [RANTAU PANJANG]**

TARIKH : 31 JULAI 2017 (ISNIN)

SOALAN : 85

Puan Hajah Siti Zailah Binti Mohd Yusoff [Rantau Panjang] minta **MENTERI PENGANGKUTAN** menyatakan apakah langkah penyelesaian yang diambil terhadap rintihan pemandu teksi tempatan di Rantau Panjang yang terpaksa bersaing dengan van Thailand (rodthu) yang menyalahgunakan Permit Bergerak Antarabangsa (ICP) dengan mengangkut penumpang bukan pelancong ke seluruh negara ini termasuk Kuala Lumpur.

JAWAPAN

Tuan Yang di-Pertua,

Peruntukan Seksyen 21 dan 25 Akta Pengangkutan Jalan (APJ) 1987 serta Kaedah-Kaedah Kenderaan Motor (Peredaran Antarabangsa) 1967 membenarkan kemasukan sementara kenderaan-kenderaan persendirian dari negara-negara asing dan proses kemasukan ini dikawal oleh Kerajaan melalui pengeluaran Permit Peredaran Antarabangsa (*International Circulation Permit - ICP*) oleh Jabatan Pengangkutan Jalan (JPJ). ICP dikeluarkan terhadap kenderaan-kenderaan persendirian negara asing dari Thailand dan Indonesia yang memasuki Malaysia melalui jalan darat.

Pada masa ini, kenderaan asing dari Thailand diberi kelonggaran untuk memasuki Malaysia tanpa ICP dan insurans bagi jarak sejauh 2km. Kelonggaran ini diberikan sebagai timbal balas kepada kelonggaran yang diberikan oleh Kerajaan Thailand melalui persefahaman yang di persetujui di antara Kerajaan Malaysia dengan Kerajaan Thailand pada tahun 1993.

Kementerian ini juga akan memperkenalkan suatu kawalan kemasukan kenderaan asing yang lebih ketat dan sistematik melalui pelaksanaan sistem *Vehicle Entry Permit (VEP)*. Sistem VEP ini akan dilaksanakan secara berperingkat dengan fasa pertama akan dikuatkuasakan di pintu sempadan Malaysia-Singapura mulai bulan September 2017 dan fasa 2 untuk sempadan Malaysia-Thailand bermula awal tahun 2018.

Sistem VEP merupakan inisiatif terbaik untuk dilaksanakan bagi mendaftar maklumat kenderaan dan merekodkan pergerakan keluar masuk kenderaan asing. Langkah ini penting untuk mempertingkatkan aspek-aspek keselamatan dan kawalan sempadan bagi kepentingan negara.